

鴻泥雜誌卷四

雪漁氏編

劉健庭聞錄載吳逆事甚悉以其尊甫爲雲南府司馬事多目睹故言之真切如此茲摘錄數條於左

吳三桂字月所先世由安徽徽州至高郵流寓遼東因家焉父驤母祖氏祖大壽之同懷也三桂自少爲邊將勇而敢戰嘗逐一騎射之騎墜地佯死三桂下馬取其首騎突起揮佩刀傷三桂鼻血流被面三桂卒斬其首携之以歸摠監高起潛爲三桂義父大喜曰真吾兒也上其功得優叙自此累遷總兵官

鴻泥雜誌

卷四

一

吳驤既降賊三桂亦以所部之衆西行赴降道遇家人來自京師者詰問得父被執狀莞爾曰此脅我降耳何患復問陳姬無恙乎時陳已爲賊所掠家人以告三桂怒曰大丈夫不能保一女子何面目見人乎遂揮衆返

自成聞三桂之來而復返也命僞相牛金星爲驤作書招之曰爾以皇恩特簡得專閫任非累戰功也不過謂強敵在前非有異恩激勸不足以誘致英士此管子所以行賞罰之令而漢高見韓彭則予重任之類也今爾徒飾軍容怯懦觀望使李兵長驅而入既無批吭搗虛之謀復無形格勢禁之力事勢已去天

命難回吾君已矣爾父須臾嗚乎識時務者可以知所變計矣昔元直棄漢歸魏不爲不忠伍子胥違楚適吳不爲不孝然以二者揣之爲子胥難爲元直易我爲爾計不若反手銜璧負鑽畀板及今早降不失通侯之位而猶全孝子之名萬一徒恃憤驕全無節制客主之勢既殊衆寡之形不敵頓甲堅城一朝殲盡使爾父無辜並受僂辱身名俱喪臣子俱失不亦大可痛哉語云知子莫若父吾不能爲趙奢爾殆有疑於括也降將唐通亦遺書招之三桂不答上書於父畧曰桂以父廕熟聞義計得待罪戎行日夜勵志冀得一當以酬主眷屬邊警方急寧遠爲

國門戶淪陷幾盡桂方力圖恢復以爲李賊猖獗不久即當撲滅恐往返道路兩失事機故爾暫稽時日不意我國無人望風而靡吾父督理御營勢非小弱巍巍萬雉何至一二日便至失墜使桂捲甲赴闕事已後期悲恨何極側聞主上宴駕臣民僂辱不勝眦裂猶意吾父素負忠義大勢雖去猶當奮椎一擊誓不俱生否則刎頸闕下以徇國難使桂縞素號慟仗劍復仇不濟則以死繼之豈非忠孝媲美乎何乃隱忍偷生訓以非義既無孝寬禦寇之才復愧平原罵賊之勇夫元直荏苒爲母罪人陵苞二親並著英烈我父矯矯王臣反愧巾幗女子父既不得

爲忠臣兒安得爲孝子乎桂與父訣請自今日父不早圖賊雖置父鼎俎旁以誘三桂不顧也傳檄遠近討賊復仇復至我朝爲秦庭之哭卽壁中薙髮與攝政王鑽刀定盟攝政王率精兵兼程而進

三桂分藩雲南居劉文秀故宅以其狹小填菜海子之半更作新府制度擬於帝居千門萬戶極土木之盛又造亭滇池中名近華浦又爲園於西郊名安阜園園內書屋一所名萬卷樓古今書籍無所不備刻開疆疏章自侈平蠻功績期垂永久塑像於報國寺在布袋和尚下像將巾衣松花色袍錦邊右手撫膝

鴻泥雜誌

卷四

三

左手執卷而左顧

西寺落成大亨文武官盪道趙廷標平日好爲詩三桂請咏金剛廷標口占曰金剛本是一團泥張拳鼓掌把人欺你說你是好漢子何敢同我洗澡去三桂大笑亦心知其諷已也

三桂有三奇物一虎皮一大理石一寶石帽頂虎皮白章黑理得之寧遠或云卽騶虞大理石屏二沐氏舊物也一高六尺山水木石渾然元人名筆一差小山巔一鶯水涘一虎上下顧盼神氣如生帽頂大紅寶石寬徑寸長二寸許光照數丈炎炎若火

三桂少時曾爲毛文龍部將後與毛氏不相聞問浙帥李強奪毛氏宅毛氏無如之何有老僕素狎三桂赴滇訴其事三桂令李還宅且責輸金謝毛氏傅宗龍亦三桂舊帥也其子某三桂待之如親兄弟稱爲傅二阿哥王府門禁甚嚴某非時出入侍衛不敢詰寧都兵科曹應遴於三桂有恩其子舉人傅燦游滇三桂以十四萬金贈行既貴不忘故舊三事可以愧世之薄三桂於督撫用年家弟帖司道用侍生帖自督撫以及首領時有餽送袁巡撫懋功內召程儀十萬金揮金如土爲防口也

順治十八年十月三桂出邊諭緬令獻永歷卽撤兵十二月朔

鴻泥雜誌

卷四

四

三桂至舊晚坡緬相錫真約我兵往迎永歷次日遣高得捷官國泰盛有功徐伯謙率兵百人往又遣吳國寶率兵二百人爲繼漏下二刻緬獻永歷併太后馬氏后王氏太子慈烜及宮女十四人太監七人又華亭侯王維恭之妻妾子女十人文武官妻女百餘人是日日昃緬給永歷曰晉王李定國至矣今送帝出就晉王軍縛竹椅爲肩輿舁永歷乘舟及水淺舟膠高得捷負以登岸永歷問其名曰臣平西王前鋒高得捷也永歷曰平西王乃吳三桂也今來此乎遂默然初三日永歷至舊晚坡初十日三桂擁永歷班師回滇

康熙元年四月二十五日三桂殺永歷於滇城篋子坡先是內大臣愛星阿議送永歷入都三桂以道遠恐有不虞愛星阿曰然則如何三桂曰駢首愛星阿以爲不可安南將軍卓羅厲聲曰一死而已彼亦曾爲君全其首領可也乃命楊坤夏國相進帛此時風霾突起屋瓦俱飛霹靂三震大雨傾注空中有黑氣如龍蜿蜒而逝太子及王維恭子皆縊翼日送太后入都

康熙五年雲南鄉試平西藩下中式者一百六十三名三桂自誇藩下子弟彬彬多文學之才主司迎合其意有口尙乳臭未入棘院填榜署名而登賢書者是科中式某後任某州知州大堂署聯云皂隸排班渾如一天星斗本州坐堂好似玉帝朝天又額其廐曰廐焚軒一何可笑

三桂於新任官知縣以上有才望素著及儀表偉岸者百計羅致令投身藩下蓄爲私人雲南府同知劉公初謁三桂目矚不轉瞬已而使其私人胡國柱道意劉公曰我已於廷試之日太和殿中投身矣胡掩耳走當胡來時袖出馮某投身券一紙云立賣身婚書楚雄府知府馮某本籍浙江臨海縣人今同母某氏賣到平西王藩下當日得受身價銀一萬七千兩後書媒人胡國柱凡賣身者皆師事國柱故當時人言滇中有三好吳三

桂好爲人主士大夫好爲人奴胡國柱好爲人師

八面觀音與圓圓並擅殊寵故宗伯南昌李明睿妓也宗伯侍兒十數輩聲色極一時之選而八面爲之魁其曹四面觀音亦美姿容亞於八面宗伯老爲給事某所得以奉三桂辛酉城破圓圓已死八面歸綏遠將軍蔡毓榮四面歸征南將軍穆占

經畧洪承疇東還三桂問自固之策洪曰不可使滇一日無事

三桂頓首受教

三桂僞國號周僞元昭武其孫世璠僞元洪化

吳藩財物充斥籍沒時裁紙折叠小刀亦至數庫

鴻泥雜誌

卷四

六

馬寶字城璧秦人少小時即力敵數人父令牧羊有同牧者攘其羔寶怒斃之拳下有司逮訊寶曰我童子也焉能斃彼有司見其幼亦疑死者不由寶而斃置獄中不加桎梏先有巨盜在獄中寶脫其械遂同逸爲盜爲人反覆無常號兩張皮狡黠善戰唐初有驍將馬三寶人羨其勇亦以三寶呼之寶雖起羣盜性嗜文墨好與士大夫遊次子自援字磐石恂恂儒雅諳聲韻之學有詩集行世

張獻忠死餘黨惟孫可望爲長羣受其約束獨李定國稍與之抗可望惡其倔强以事杖之百定國憾甚定國字一人綏德州

人勇幹剛直目不知書有昆明金公跡者知其可動取世傳三國演義時時爲之誦說定國樂聞之已遂明斥孫可望爲董卓曹操一流而以諸葛武侯盡忠之事期定國定國大感悟謂公跡曰孔明何敢望關張伯約之所爲不敢不勉自是益與可望左壬辰歲入廣西不復稟命可望遣馮雙鯉襲之定國覆其軍乙未定國攻廣東新會爲平南王尙可喜所敗退走南寧時永歷在安隆可望患定國之入安隆也遣關有才等以精甲四萬拒之田州定國襲破有才收其兵丙申至安隆奉永歷入雲南丁酉可望大舉擊定國其部白文選等密與定國約陣而不戰

俾定國全力擊中軍以故可望全軍覆沒可望走湖南詣經畧洪承疇投降入都封歸義王具言雲南可收狀三桂聞之欲自以爲功上疏請進兵報可分兵三路中路經畧洪承疇由湖廣入東路趙布太由廣西入西路三桂由四川入三路俱集戒期入滇嗣李定國拒戰敗績遂奉永歷西走三桂率兵追之復敗定國於磨盤山定國走銅壁關永歷已先入緬定國與相失定國聞白文選在木邦移兵與會文選率賀九儀等入緬迎永歷緬調兵守文選不能攻乃返仍駐木邦定國移猛緬嗣定國大敗緬兵殺緬兵以萬計而永歷終不能出緬酋盡殺永歷從臣定

國以糧竭移營洞武復由九龍江走黑線至車里之猛腊聞永歷訃遂哀憤成疾死

陳圓圓本吳人明懷宗時外戚周嘉定伯以重貲購之納於椒庭懷宗以國事焦勞遣還周邸時吳三桂奉詔出鎮山海關嘉定伯餞之出女樂佐觴圓圓在列吳深屬意焉詰朝使人告於周有紫雲見惠之請周許諾吳以千金爲聘限迫卽行未娶也嘉定伯盛具奩粧送其父驤家未幾闖賊攻陷京師携驤以招其子家人潛至帳前約降吳問陳娘何在使以籍入告吳大怒曰大丈夫不能自保其室何以生爲卽作書與驤訣縞素興師

賊怒盡屠吳之家口其正室亦遇害而圓圓反以籍入無恙嗣其部將於都城搜訪得之飛騎傳送時吳方駐師絳州聞之大喜列旌旗簫鼓三十里親往迎之由此寵愛無間及吳進爵爲王欲將圓圓正妃位圓圓力辭不承命吳乃別娶中閩而後婦妬甚凡羣姬之艷而進幸者輒殺之惟圓圓能順適其意居別院雖貴寵相等而不相排軋圓圓本姓邢府中皆稱爲邢太太久之吳蓄異謀圓圓窺其微以齒暮請爲女道士日以藥鑪經卷自隨吳訓練之暇每至其處清談竟晷及吳造逆病歿籍其家其姬妾俱入禁掖圓圓之名氏獨不見於籍其元機之禪化

耶抑紅線之仙隱耶皆不可知然遇亂能全晚節克終使吳遇於九泉其負愧何如矣

陳定九作圓圓傳內有吳藩謀逆半出同夢之謀一語圓圓歿後深怨此語之誣百餘年後滇中王鄭二生爲扶鸞之戲圓圓降臨初次降壇詩曰舊日繁華事盡刪春來愁鎖兩眉灣珠襦已分藏棺底金盃猶能出世間離合驚心悲畫角興亡遺恨記紅顏看他跋扈終何益寶殿飄零翠瓦斑我本陳氏圓圓也來滇未久物化人間香埋地下已百餘年矣今夕得傍乩壇情合有緣複製小詩十首欲借諸君刊刻聊暝九原之目奈夜漏催

鴻泥雜誌

卷四

九

人柔魂難竚不能遍述姑容來夜再陳至次夜又降詩曰落花芳徑夜還開有約何妨首再回小犬隔離空吠影一鈎新月破雲來東風輕拂海棠梢香霧空濛濕絳綃一縷柔魂嬌欲化倩誰紅袖夜相招女史圓圓如約而至諸君皆當時碩彥爽氣逼人夜臺人何敢久傍以幽俚相投故借乩作合幸無以他見問卽問亦不知知亦不答也祈先諒之如妾非不自笑長眠已久好名之鄙豈未化耶但與田婦村姑同一腐朽後世雖稔其名無由識其人爲深可恨耳小詩錄出請諸君研墨濡毫以待可也清茗一杯爐烟半炷足見主人情重新詩十首心緒百端聿

稱薄命多愁一笑憶昔深藏田竇家侯門歌舞艷如花而今多
作殘宵夢隧道漁燈掩碧紗英雄其奈太情多戰鼓聲中奪翠
娥莫怪當年吳祭酒誚農夫壻爲儂歌春來纔聽鷓鴣啼又見
空梁落燕泥寒食飛花心事亂任他斜日下樓西芳草萋萋沒
故宮夜深重過掖門東踏青數試新羅襪底樣新裁一瓣紅素
馨開遍舊時花小雨飛紅映淺沙蛺蝶倦尋芳徑宿雙雙飛過
玉鈎斜花有清香月有痕夜臺春色更銷魂尋詩不覺歸來晚
燐火熒熒照墓門釵鈿空切舊承恩金屋春深掩淚痕做鬼有
情天亦恕任吹玉笛向黃昏三次降筆詩云又是春三二月天

鴻泥雜誌

卷四

十

陌頭楊柳盡含烟一坏荒塚斜陽晚遍處青山泣杜鵑珠箔銀
屏手自開鳳鞋紅印破蒼苔難忘昨夜題詩處重過仙家舊講
台因諸君子有事失約予懷悵悵而還今夜祈得仙符不妨少
留請畢其詩幸卽付棗梨以光泉壤勝各携麥飯一盃紙錢一
陌弔我於夕陽蔓草之間者多多矣如必敦古道可於刻詩成
冊之後携向商山西北隅平疇樹側呼我名而告之冥冥有知
自必聞聲啣結切勿以之覆醬使鄙人有付託非人之憾也新
詩臨徧薛濤箋無限春愁祇自憐花影一瓶香一榻粧成小舞
獨娉娟爲怕春寒不捲簾金爐香盡手重添梨花院落溶溶月

夜夜清光照綺檐蕩蕩春山烟樹濛離離禾黍月明中憑君欲
話當年事淚染胭脂辱井空諸君欲以往事見問難於盡述用
賦長篇畧陳大概我本吳門浣紗女圓圓小字嬌白苧自幼深
閨秀出羣粧成多厭鉛華御稍長舁藏貴戚家珠圍翠繞擅歌
舞當時名譽動京華能使王侯屢延佇一朝蟻賊擾南枝孩兒
十八焚鐘簋鼎湖龍已去深淵萬里分封來蠻宇碧鷄山色映
瑤窻翠海波光環珠戶後宮清麗盡如花獨妾承恩嬌不語星
移物換彩雲收傷心瘞玉歸黃土環珮難從月夜歸故園姊妹
空愁予詩歌皆未有盡姑再一申嘆息滄桑易變遷西郊風雨

鴻泥雜誌

卷四

十一

自年年諸君弔我青山下冷落何曾有墓田盡將樽酒奠荒阡
點滴真難到九泉贏得新詩傳絕域一回含笑一淒然爐烟一
碧透窻紗符使重迎油碧車又是一番寒食節落花飛絮正無
涯傷心黃土百年墳新火遙從隔院分冷落自甘還自惜翠裙
香盡手重薰王君豪俠異凡庸鄭子殷勤義氣鍾肯爲夜台人
作賦墨濃情篤感吳儂銀管新詩手自裁多君珍重甚瓊瑰夜
深燭影搖紅處應有啼粧斂衽來詩將付刻足見諸君高義賦
此志謝從此人鬼殊途宿緣有定不克頻來諸君約清明後尙
候於商山舊園西北平疇內山花欲笑小鳥迎人試誦前詩恍

若有睹前人有詩云夕陽一片桃花影中有亭亭倩女魂予之
形神亦可彷彿見之矣自是遂絕再請之亦不至攷商山在滇
省北門外相傳圓圓葬於此山之麓而歲久湮沒竟不能得其
墓所後於嘉慶九年六月李鶴坪賈菊厓諸子設乩香雪亭仍
請圓圓而圓圓不至再四焚符女鬼王氏降有圓圓仙去之語
乃各賦題詞刊刻降筆焚於商山終踐王鄭之言

康熙十二年十一月吳三桂反初三桂收畜亡命久謀不軌適
命搬移家口逆黨胡國柱吳應期吳國貴夏國相郭壯圖衛璞
方光琛方學範等密畫於內馬寶力贊於外張國柱高起隆王

屏藩等應之殺巡撫朱國治按察使李興元不屈械繫於獄雲
南知府高顯辰同知劉崑皆被杖安置復潛通貴州提督李本
深爲接應雲貴總督甘文焜知勢不可爲謀守鎮遠扼賊咽喉
以徵調援兵力圖恢復比至鎮遠而副將姜義先已從賊文焜
父子及筆帖式何善雅圖皆死之三桂遂使吳國貴爲前鋒徑
寇辰沅至荆江使王屏藩由蜀寇漢中夏國相寇江西又糾廣
西孫延齡馬雄廣東尙之信福建耿精忠同反數省騷動
土命滿漢大兵討之賊不敢渡江既而四川兩廣次第克復三
桂屯兵湖南搜括糧餉民人困苦引領以望大軍十六年三桂

求援於蒙古割麗江江內喇普地賂之十七年三桂死於衡州十八年海朝龍起兵鶴慶田進學起兵永昌討吳賊不克朝龍敗由吐蕃走京師進學死十九年大軍取貴州先是郭壯圖等因三桂死擁其孫世璠進屯貴州以拒大兵及定遠平寇大將軍貝子章泰統征南將軍穆占鑲藍旗叅贊都統喇賽正白旗前鋒統領薩克查巴圖魯正藍旗都統釋迦保正黃旗先鋒統領陝納海鑲白旗副都統蟒紀錄正黃旗副都統陶代鑲紅旗副都統花色正藍旗副都統公圖正白旗副都統宜思孝正紅旗副都統官保鑲黃旗內閣學士兼禮部侍郎薩海署副都統

盧崇峻綏遠將軍湖廣總督蔡毓榮江西總督董衛國建義將軍林興珠貴州提督趙賴山西提督周卜世等滿漢官兵由湖廣克辰龍關楓木嶺取鎮遠清平破僞將軍韓天福於平越世璠遁回雲南二十年正月大兵克盤江世璠遣僞將軍線絨屯兵江西坡扼險以待章泰大敗之賊分兵據黃草壩征南大將軍賴塔統叅贊希福馬齊趙連等及兩廣總督金光祖福州將軍馬九玉率滿漢兵由泗城州奪石門坎拔安籠所繞出賊後大破之二月賴塔至曲靖金城歸附線絨始遁章泰遂會師於曲靖十九日師抵雲南世璠遣郭壯圖悉精銳迎戰大兵夾攻

之大破於呼馬山下賊嬰城拒守大兵圍之時滿漢兵數十萬方以糧糗爲慮巡撫伊闢布政使王繼文開誠遍諭安集流移動餉召買萬姓踴躍晝夜輓運未幾伊闢卒於軍以王繼文爲巡撫田啟光爲布政使又

命學士佛倫侍郎金鋹等馳至軍中總理糧儲四月賊將馬寶自尊義由尋甸奔楚雄都統希福提督桑格迎戰於呂合擒之時胡國柱王緒王公良李匡等復合潰衆於迤西夏國相高起隆廖進忠王永清等潛聚於廣南大兵分路搜討胡國柱王緒李匡自殺擒高起隆等俘馬寶夏國相於京餘悉磔於市迤西

廣南平八月宣威將軍紀哈里同副都統希福覺羅西布勇畧將軍雲貴總督趙良棟由建昌渡金沙江鎮安將軍噶爾漢護軍統領佟雅副都統得爾德翁艾張長庚由永寧會師於雲南十月初八日大兵移營逼城賴塔進兵銀錠山蔡毓榮奪重關及大平橋穆占趙良棟王繼文奪玉皇閣遂至東西寺章泰策應賊悉力拒守王繼文遣人自鶴慶北勝運紅衣炮至銀錠山晝夜攻擊賊大懼章泰等復書告示射八城中諭以順逆賊皆有離心二十二日賊黨余從龍吳成鰲出降趙良棟王繼文領兵攻得勝橋蔡毓榮攻大東門林興珠攻草海賴塔攻銀錠山

並分兵攻近華浦四面逼城復遣余從龍入城招撫二十八日城中賊亂線域等擁兵入郭壯圖家殺壯圖心腹郭得勝壯圖及其子宗汾舉火自刎世璠亦自殺線緘吳國柱吳世基何進忠黃明等開門出降城下之日兵不血刃隨磔方光琛方學範於市斬世璠壯圖首級並戮吳三桂屍俱函送京師三十日章泰遣穆占馬齊入城大兵分守各門籍吳世璠家產大兵陸續凱旋

土酋普名聲謀叛後中砲死其妻萬氏擁衆據阿迷州與安南土酋沙源諸子定海定洲通招定海爲贅壻已復殺定海而贅

定洲定洲既贅萬氏兼有安南阿迷之衆復吞併夷地南至交岡順治二年元謀土酋吾必奎反黔國公沐天波調定洲赴剿逗留不進及必奎伏誅後定洲始至留屯省城外不肯歸聞天波家饒富足定洲心動陰結其左右爲內應以是月朔入城辭行率衆襲天波時變起倉卒天波由小竇出西城太夫人陳氏夫人焦氏俱自焚死天波遂奔楚雄定洲因盡得沐氏所有據省城劫巡撫吳兆元爲題請代天波鎮滇又至祿豐執家居詹事王錫袞置貢院脅之與兆元傳檄各州縣旋聞天波在楚雄自率衆追之是時楚雄新爲吾必奎所破金滄道楊畏知奉調

監軍至楚雄人留之遂駐楚聞定洲西出與天波計守禦之具未集曰公在楚賊以全力聚攻城必破公不如西走永昌使楚得爲脩賊欲西追恐楚襲其後留攻楚又恐公從西來首尾牽制上策也天波從之定洲至楚雄閉門不得入爲畏知所給遂去遣其黨王朔李日芳等分攻大理蒙化陷之屠殺以萬計又圍武定推官陶光印固守攻四十餘日乃去三年定洲復攻楚雄時賊恐畏知截其歸路又聞迤東祿永命龍在田等各自守因不敢至永昌撤兵還竭力攻楚雄楚雄守具已集屢攻不能下畏知視賊懈輒出奇兵奮擊前後所殺甚衆圍數月賊稍稍

引去東攻石屏守堅復回攻寧州破之四年正月定洲復攻楚雄時定洲既陷迤東諸郡縣又引兵而西分爲七十二營每七營各爲一大營統之環楚城鑿濠三重爲久困計畏知竭力固守經八十餘日糧盡援絕幾不能支會流寇張獻忠死餘黨孫可望李定國劉文秀艾能奇率殘兵由遵義入貴州龍在田使人告變且勸其至滇可望因詐稱黔國焦夫人弟率兵來復仇三月可望等入滇賊撤兵往援曲靖乃解圍去孫可望等破曲靖及交水俱屠之執巡按羅國巘聲言欲搗定洲巢穴分兵出蛇花口定洲時自楚雄還省城聞之大懼遂殺故詹事王錫袞

於貢院焚南城樓遁走臨安可望知定洲走卽由陸涼宜良趨省據雲南五月孫可望遣諸將分收迤東諸郡劉文秀屠武定李定國屠臨安還至晉寧鄉兵拒之復屠晉寧昆陽呈貢歸化八月孫可望自率兵逼迤西楊畏知禦於祿豐之獅子口兵敗被執可望聞其名不殺誘降之畏知曰爾從吾三事卽降一不用獻忠僞號二不殺百姓三不擄婦女可望皆許之卽執箭對誓迤西得免屠戮畏知之力也時沐天波在永昌可望至大理以書招之天波遣子報命可望厚待天波子陰使劉文秀隨之疾馳至永昌會天波於北城樓遂携之同楊畏知等俱至省五

年八月李定國擒沙定洲及萬氏初定洲走歸臨安屯兵俱革龍與萬氏分險自守其下湯嘉賓陳長壽等各據一山立營相去數十里爲犄角之勢私通交趾借其援以固結蠻心一日偶集於嘉賓營定國偵得之率兵遽至圍以木城固守三閱月絕其水源諸蠻懼出降者相續遂械定洲萬氏等數百人回省磔於市

沐天波當沙定洲之難欲効死其左右以存身滅賊爲言乃出走楚雄與副使楊畏知畫策固守賊攻累年士民皆無離志城得不陷孫可望李定國等入滇遣人招之天波執義不赴可望

等約以雪仇恢復乃歸各官皆受僞符天波獨佩黔國舊印及可望入黔遂與李定國謀迎永歷事之時僞王艾能奇死永歷及定國欲以能奇妻妻天波使將其衆天波力辭不受後從永歷入緬諸臣多傲慢天波於顛沛中執君臣禮甚恭緬酋獻永歷誘至木城天波察其有變揮石鎚殺數十人遂遇害其子忠亮被執不食旬日死黔國自沐英傳至天波凡十三世天波更殉難以死遂與明運相始終焉

亦資孔爲黔滇交界之所有驛屬普安普安爲夜郎地古梁州也錢湘舫榮典滇試陳夢湖廷桂副之其亦資孔驛與夢湖夜

鴻泥雜誌

卷四

十八

話詩云建章北望玉繩低行盡青山見碧雞與爾高吟倚牛斗不知身在夜郎西仙郎詩思逼清秋得助江山氣更適今夜月明笳吹靜無人解爲唱梁州

樊菱川如鑑守麗江張君彬爲井使引重之爲評其集且贈以時云君在錢唐山水間乾坤清氣得來難十年燕市千金骨萬里沙江七品官吟到蒼山羞雪月記成蘆浦辨鹹酸京華久讀三張賦載協於今正並看往復疊韻至於再三其云心契何須拘禮數宦遊同是帶儒酸可以想其風韻矣

史漁村制軍初以狀元出爲滇首自大理移首郡出門不張及

第牌謁見者輒先容毋涉及狀元二字或獻以詩云邊荒萬里
仰醇醴滿市招牌史國公底事流霞盃幸得偏偏不寫狀元紅
言雖俚俗亦婉而多風矣

宜良令李小雲書吉詩才雋妙其普溯旅館題壁云吳儂少小
住琴溪老去生涯付馬蹄旅館曉雞催夢醒不知身在萬峰西
張補裳爲麗井大使其山居漫興云酌酒澆花意興闌盤殮市
遠燕賓難菌各羊肚沾葷味菜號龍鬚愧素餐官各一方忘世
熱山深五月逼人寒劇憐智識看天小何日衝衢振羽翰山居
閒咏云不聞黜陟葛天民又見鶯花兩度春莫愁頻年人坐井

鴻泥雜誌

卷四

十九

魚塩中有建勲臣窻間遠岫如屏障門外鳴蛙當鼓吹試聽一
呼山四應齏員雖小有施爲霜乾遍嶺蒿爲炬雨漲沿溪筏作
橋祇看祭龍時節過家家料理種山蕎深水魚苗無用買滿山
藥草不須尋負塩出井溪邊女解按宮商撥口琴卯飲豈緣傾
甕斷午炊偶爲濕薪遲夕陽欲落微風度聽唱民家笛一枝浪
說江淹筆有花年當垂老學當家全忘子史經書傳細記油塩
醬醋茶和粉慢搓牛到滾拌塩細嚼狗心焦何須盛饌開家宴
便是詩人樂夜宵墨短勤磨愁染指書新屢借怕傷廉杜門竟
類枯僧坐盡日看山聽煮塩白板扉前聞喚起綠楊枝外語催

歸分明似說山林好不住江鄉計是非心赤不嫌官冷淡病多
恰有睡工夫但教養息騫鵬翮切莫悠游守兔株十章排鼻跌
岩似嘲似惋寫井上風光畧盡

補裳又有咏負塩婦詩云負塩婦負塩免租賦先期約比鄰終
歲幾來去麥熟不成炊蕎開何暇顧赤脚歷層坡蓬頭濕冷霧
寒月朔風號陰巖水泉沍篋篋壓頰肩冰磴窘濶步十里一停
筐五里一倚樹少遲寒更嚴雪阻山頭路過門聞兒啼息足防
吏怒塩乾分益輕塩濕心屢怖入城幸交納糧阻敷抵數門前
吏又來夫也出無袴又有雪中再過塩路山感賦云今我歸來

鴻泥雜誌

卷四

二十

歲云暮塩山欲雪生烟霧風聲獵獵雲漫漫遠澗飛泉凝瀑布
三堆五堆羣玉峯千株萬株大庾樹轉過層坡雪愈深輿夫沒
蹶不能步一廟危乎峯頂存四圍那有人家住須臾日睨勉且
行下坡認得來時路路旁買醉樂生還沽酒少錢裘質庫嗟彼
無褐負塩夫日暝尙欲翻山去二詩形容塩婦塩夫之苦描寫
盡致惟郵民者知之耳

杜藕莊仕途顛倒每多感懷之作然怨而不怒頗得小雅之旨
其祿豐道中于役有感云西風吹老綠楊枝蕭瑟情懷祇自知
宦海浮沉心似水塵容憔悴鬢添絲佯狂久效楊凝式同調難

逢鍾子期歸計未成空碌碌故園松桂幾時窺可以想見其胸次矣

道光丁亥戊子間王雲榭楚堂先生爲雲南方伯廉訪則翟雲莊錦觀先生也貴州古稱貴竹而祁竹軒墳何竹居金兩先生開藩陳臬於斯黔中嵩曼士溥中丞題句云貴竹稱雙竹南雲見二雲二省人傳爲美談佟鏡堂景文時爲貴東觀察作竹雲歌以紀其事詞華清麗傳誦一時其序云楊升菴集云桂竹後稱貴竹今貴州陸伯生記云漢武朝彩雲見南中雲南之名始此何竹居舊理雲巖移巡竹西道光丙戌春擢竹廉使王雲榭

鴻泥雜誌

卷四

二十一

自楚至開藩於雲祁竹軒亦於是冬由溈來旬宣於竹翟雲莊本竹產以丁亥夏陳雲臬事竹軒竹居因竹之俗以治竹雲榭雲莊相雲之宜以化雲竹雲之民胥感其德而頌聲作 曼士先生聞而樂之手書一聯云貴竹稱雙竹南雲見二雲志喜也亦紀實也命景文系以詩詩曰卿雲郁郁銀棱陌葦竹猗猗蔭涵碧萬里清風拜葛公連圻膏雨勞郇伯英蕩偕來銅鼓巖奇峯對出金馬宅西南光景喜常新兩兩紅薇映翠柏曼士中丞思不羣琳瑯十字掞天文吟成鳳翽森雙竹書罷鸞翔絢二雲氣求聲應方類聚珠聯璧合星野分一經品題乃覺造物巧地

靈人傑豈但古所云竹軒亮節少儔侶玉宇軒軒絳霞舉時吹
律琯畫屏前似扇簟管却炎暑竹居廣居差可擬愛竹之氓如
愛子夢草亭外金琅玕徧飼鵝雛賡樂只雲榭清暉照華隈非
烟罨靄優曇開鴻規傑構矗雲表英聲威遠琛賚來雲莊雅望
平泉儕平生謹慎籌邊才甘露垂庭鵲巢樹元元幽隱燭丹崖
懿惟 芸臺大府併幪遠六纛時巡迎繡幟慈竹檀欒芳杜洲
大雲灑潤靈芝獻畢雨箕風寄四君承流宣化資忠悃耕雲菽竹
兩中丞志同道合分戎闕竹苞雲爛贊

昇平陸讐水慄車書混竹有筠雲有彩呈祥獻瑞通真宰四美

鴻泥雜誌

卷四

二十二

具二難并天造地設符嘉名此雲此竹不知幾千年未聞一時
岳牧皆名賢而况靈均雅號不謀合從此地以人重因人傳又
聞中丞舊遊昆華館往來雲竹清陰滿迄今愛竹猶望雲竹馬
歡迎雲似繖兩地之民爾莫爭惟願竹雲同被仁風暖文也不
才媿伏波適從岫町來牂牁親見竹雲春藹藹惟
天子使吉人多嶰竹松雲頌協和蠻烟瘴雨胥漸摩西林雅化
快先睹拜手更獻竹雲歌

明時麗郡土知府木公字公恕號雪山嗜學工詩於玉龍山南
十里爲園枕籍詩書哦松吟月嘗以詩質於楊升菴升菴錄其

詩名曰雪山詩選叙而傳之其曾孫木青字松鶴亦工詩刻其詩曰玉水清音集中如輕雲不障千秋雪曲檻偏宜半畝荷含烟翠篠共詩瘦啄麥黃雞佐酒肥皆佳句也

周雁沙太和恩貢趙紫笈室也工詩善彈琴刻有繡餘吟草集中絕無風雲月霧之詞其咏古諸作皆饒有識力猶記其彈琴得小字詩云天際隨陽到水涯雙飛雙宿伴蘆花琴中繹得關心調小字從今篆雁沙可想見其風雅矣

葉小庚申薊以己巳庶常出爲富民縣令調補昆明旋陞巧家司馬有句云富民差可容窮吏拙宦何修得巧家可謂匠心獨